

Heiqmoegyau Maeriu Cingsih Daegsaek Gagmiz

别具特色的靖西提线木偶戏

□ Nungz Li/农莉



▲ Vunzlai comz yawj heiqmoegyau maeriu.

◀ Canghheiq bae lajmbanj yienj heiqmoegyau maeriu.



▲ Moegyau maeriu camgya cunzbyaij.

Heiqmoegyau maeriu dwg cungj heiq ndawbiengz vunzlai Bouxcuengh Cingsih Si gyaenz yawj ndeu, caemh heuhguh "heiqfaexdeu" "heiqdoj", binaengz youq ndwen-cieng, roeb bi' nyinh roxnaeuz miz hekgviq daengz seiz, youz boux canghheiq laux mingzdaeuz ndei haenx yienj hawj vunzlai yawj. Heiqmoegyau maeriu youq Cingsih riuzcienz daengz seizneix gaenq miz 700 lai bi lizsij.

Mwh yienj heiqmoegyau maeriu, youq dieghoengq gyangdien aeu benjfaex dap aen daizheiq ndeu, baihdaw venj fan baengzmuq ndeu guh raeblaeng daizheiq, bouxyienj youq baihgwnz raeblaeng baengzmuq cuengq moegyau okdaeuz gaembaeng dwk doq ciengq doq yienj, mwh yienjheiq bouxyienj boux ndeu yaek yienj song aen giek caeuq aeu song cungj diuhciengq ciengq vahndawheiq, mbanj canghheiq bonjsaeh ak haenx lij ndaej yienj baenz 3 daengz 6 aen giek ne, ndaw heiq gawq miz lwnh citgoj lumj boux youq henz lwnh nei, youh miz gij dungcoz yienhciengz yienj haenx, ndei dingq ndei yawj.

Heiqmoegyau maeriu mwh yienjciengq dingzlai aeu bangciengq daeuz dakdaix heiqfaenh. Vah ciengq ca mbouj geijlai cungj dwg aeu gij yaem fwen dawzyinh ndawbiengz Bouxcuengh, aeu Vahcuengh ciengq lai. Diuhciengq miz diuhmbaetva, diuhbingzsang, diuhgyangznaek, diuhdae daengj. Gij najveh de itbuen dwg aeu faexmakbug roxnaeuz faexgingq daeuz gaekdeu baenz, daz lihsaek hwnjbae, ciuq gij singqcingz bouxvunz yaek yienj haenx aeu maeg veh da veh bak, bouxcungcig bouxyakrwx baez yawj couh mingzbeq, sai mbwk laux nyaeq faen ndaej cing, gig miz daegsaek deihtueng caeuq

daegsaek minzcuz.

Heiqmoegyau maeriu mbouj miz bonj sawheiq dingh' aeu yawh-bien haenx, canghyienj youq yienj-heiq gaxgonq yawj sawcuenh, geiq-maenh doiqvah, cingzciet, hwnjdaiz le doq bien doq ciengq. Citheiq dingzlai bae ndaw 《Fungsaenz Yenji》《Suizdangz Yenji》《Cieng Ranz Yiengz》《Goj Ngwzhau》doenghgi sawcuenh ciuhgeq neix genj aeu. Doengh bi neix daeuz gyoengq canghheiq caemh aeu goj-gaeq ndawbiengz caeuq citheiq ciuhneix daeuz biujyienj, gyalai le gij neiyungz heiqmoegyau maeriu.

Heiqmoegyau maeriu youq Cingsih gyoebbaenz, hwngfat, hoenghvuengh, riuzcienz ndaej gig nanz gig gvangq. Bi 2012, heiqmoegyau maeriu ndaej lied haeuz swcigih gaep feihvuzciz vwnzva yizcanj henoh mingzloeg. Vihliux engq ndei swncienz vwnzva cienz-doengj Cingsih, daezswng gij suijbingz yisuz biujyienj bouxyienj

heiqmoegyau maeriu, daj bi 2013 gvaqdaeuz, Cingsih Si gyarengz guh hong swncienz, henoh heiqmoegyau maeriu, bued ngaenz cienhangh youq Liengbyau Cunh Mbanjufuzhang laebbaenz dieggoek songanq swncienz heiqmoegyau maeriu, dingh-geiz heuhcomz gyoengq bouxyienj heiqmoegyau maeriu guh songanq, guh gij hozdung heiqmoegyau maeriu haeuz hagdangz, caemhcai dawz yienj heiqmoegyau maeriu bien haeuz ndaw aendoih hung hozdung cetcunz fungsug minzcuz bae, hawj heiqmoegyau maeriu youq ndaw swncienz hwngfat goegcangq hwnj-daeuz. Geij bi neix daeuz, heiqmoegyau maeriu Cingsih gonqlaeng biujyienj 200 lai ciengzbaez hawj gyoengq baengzyoux guekrog Meijgoz, Yizbwnj, Sinhgyahboh, Daigoz, Hanzgoz, Fazgoz, Hozlanz daengj caeuq gij vwnzva donzdij nem lauxhangz, bouxmaeq ndaw guek haenx, mienhyingyang ngoenz beij ngoenz gvangq.



▲ Canghheiq vih moegyau cangndang.

◀ Mwh biujyienj boux vunz ndeu aeu yienj song aen giek doxhwnj.



▲ Yienj heiqmoegyau maeriu caemh miz roq gyonglaz ngod ngeihyienz boiqhab.



▲ Canghheiq youq gwnz naiveh moegyau daz saek.



▲ Aen moegyau maeriu guh sat le yiengh lumj raixcaix.